

本草綱目拾遺

本草綱目拾遺草部下目錄

浙貝 土貝

草棉

紫草茸

獨腳連

獨腳一枝連八角連附

露花粉

通血香

野馬豆

夏草冬蟲

綿絮頭草

鴉膽子

卽苦參之子

元寶草

雀梅

鐵烏鈴

爛酣草

土當歸

開金鎖

鐵指甲

雪裡青

荔枝草附

落得打

苦花子

佛手草

草石蠶

毛葉仙橋

貓舌仙橋附

荷包草

鼠牙半支

狗牙半支

虎牙半支

馬牙半支

狗尾半支

金雞獨立草

神仙對坐草

紫羅襪

龍鬚

野席草  
烏龍鬚

眞珠草

九龍草

石打穿

鐵笄筭

狗卵草

一粒金丹

兔耳一枝箭

獨葉  
一枝

耳

金邊兔  
兒酸

金線釣蝦蟇

雞融草

老君鬚

葛公草

芸香草

鏡面草

石將軍

五葉草

蛇草

千年健

蜈蚣萍

老鶴草

鬼香油

肥兒草

玉叉草

石蛤蚧

香蕉

鐵樹葉  
鐵樹

虎頭蕉

蘇草

解暈草

卽廣東  
萬年青

萬年青

仙半夏

各種  
附

建神麵

白酒藥  
附

帕拉聘

一枝蒿

香草

臭草



本草綱目拾遺卷五

錢塘趙學敏恕軒氏輯

草部下

浙貝 土貝

今名象貝去心炒 百草鏡云浙貝出象山俗呼象貝母皮糙味苦獨顆無瓣頂圓心斜入藥選圓白而小者佳○葉闇齋云甯波象山所出貝母亦分兩瓣味苦而不甜其頂平而不尖不能如川貝之象荷花蕊也土人於象貝中揀出一二與川貝形似者以水浸去苦味曬乾充川貝賣但川貝與

象貝性各不同象貝苦寒解毒利痰開宣肺氣凡  
肺家挾風火有痰者宜此川貝味甘而補肺矣不  
若用象貝治風火痰嗽爲佳若虛寒咳嗽以川貝  
爲宜

張景岳云味大苦性寒陰也降也乃手太陰少陽  
足陽明厥陰之藥大治肺癰肺痿欬喘吐血衄血  
最降痰氣善開鬱結止痛消脹滿清肝火明耳  
目除時氣煩熱黃疸淋閉便血溺血解熱毒殺諸  
蟲及療喉痺癰癤乳癰發背一切癰瘍腫毒濕熱  
惡瘡痔漏金瘡出血火瘡疼痛爲末可敷煎湯可

服性味俱厚較之川貝母清降之功不啻數倍反  
烏頭又解上焦肺胃之火

張石頑本經逢原云貝母浙產者治疝瘕喉痺乳  
癰金瘡風癩一切癰瘍同苦參當歸治妊娠小便  
難同青黛治人面惡瘡同連翹治項上結核皆取  
其開鬱散結化痰解毒之功也

吹喉散 經驗廣集治咽喉十入症俱效大黑棗  
每個去核裝入五楮子一個去蟲研象貝一個去  
心研用泥裹煨存性其研極細末加薄荷葉末少  
許冰片少許貯磁瓶內臨用吹患處任其嘔出痰



涎數次卽愈

對口 楊春涯驗方象貝母研末敷之神效

土貝母

一名大貝母百草鏡云土貝形大如錢獨瓣不分  
與川產迥別各處皆產有出安徽六安之安山者  
有出江南宜興之章注者有出甯國府之孫家埠  
者浙江惟甯波鄞縣之樟村及象山有之入藥選  
白大而燥皮細者良

百草鏡云味苦性平微寒無毒能散癰毒化膿行  
滯解廣瘡結毒除風濕利痰傅惡瘡斂瘡口茅昆

來筆記味大苦專消癰疽毒痰楊梅結毒非此不  
除

乳癰初起。白芷土貝母各等分爲細末每服三  
錢陳酒熱服護暖取汗卽消重者再一服如壯實  
者每服五錢。楊春涯驗方天花粉乳香去油沒  
藥白芷歸尾土貝母赤芍獨活川芎各一錢甘草  
節陳皮各八分穿山甲三片皂角刺一錢五分金  
銀花二錢五分防風一錢二分好酒煎服。又方  
白芷梢土貝母天花粉各三錢乳香去油一錢五  
分共炒研末白酒漿調搽再用酒漿調服三錢

乳癰 外科全生紫河車草浙貝各三錢用黃糖  
拌勻好酒和服盡醉蓋被取汗趙貢栽云浙貝乃  
甯波土貝母也

治乳岩 葉氏驗方陽和湯加土貝母五錢煎服  
數日可消。姚希周濟世經驗方治乳岩已破用  
大貝母核桃槁金銀花連翹各三錢酒水煎服

癰痺 不論已破未破皆治瑞安生驗方土貝母  
半筋牛皮膠四兩敲碎牡蠣粉炒成珠去粉爲細  
末水發丸菘豆大每日早晚用紫背天葵根三錢  
或用海藻昆布各錢半煎湯吞丸三錢。又癰痺

膏藥用牛皮膠水熬化一兩入土貝母末五錢攤油紙上貼之。○吉雲旅抄紫背天葵一兩五錢土貝母昆布海藻各一兩西牛黃三分海螵蛸五錢陳膽星三錢桔梗一兩共爲細末酒發爲丸如菜豆大每日服六七十丸好酒送下。○千金不易方治男婦小兒生癰痺內消用土貝母研末陳米醋調搽數日卽消。○仙姑玉環散治痰核癰痺未潰用此方生南星生半夏土貝各等分研末醋蜜調勻敷

癰痺初起 土貝研細陳米醋和搽數日暗消○

又方土貝母大力子全蟲洗各五錢紫背天葵根  
昆布洗海藻洗各一兩青皮蟬退各三錢甲片炒  
四錢蜈蚣酒炙七條當歸二兩爲末蜜丸砂仁湯  
下三錢虛加人參○種福堂敷痰核瘰癧方用生  
南星生半夏生大黃各一兩大貝母昆布海藻海  
浮石銅錄明礬各五錢用商陸根汁葱汁薑汁蜜  
四味調敷○又痰核瘰癧膏中用大貝母

痰核方 人參甘草各六分川芎桔梗陳皮木香  
烏梅各八分當歸白芷防風茯苓各一錢半夏五  
分生薑三片黑棗二個水二鍾煎服如患處有水

不乾加知母一錢土貝母一錢

消燥癢 傳信方穿山甲和沙炒牛皮膠切碎麥  
殼炒各二兩土貝母連翹各一兩其爲末大人三  
錢小兒二錢

治汗斑 集驗土貝母一兩南硼砂一兩冰片一

分其研末搽之卽愈

家寶方硼砂只用五錢以  
暑月出汗時頻擦乃效

治鼠瘡 彙集關紹聖方大鯽魚一尾皂角內獨

子每歲一個川貝母三錢土貝母二錢將皂角子

貝母入魚肚內黃泥包裹陰陽瓦炭火焙乾存性

研爲細末每服三錢食後黃酒調服忌葷百日

手發背 慈惠編生甘草炙甘草各五錢角刺二錢五分土炒土貝五錢五分半夏一錢五分甲片二錢五分炒黑知母二錢五分加葱薑水酒煎二劑卽愈

刀割斧砍夾剪鎗箭傷損 集驗云土貝母末敷之止血收口

毒蛇咬 祝氏効方急飲麻油一碗免毒攻心再用土貝母四五錢爲末熱酒沖服再飲酒盡醉安臥少時藥力到處酒化爲水從傷口噴出候水盡將碗內貝母渣敷傷口垂死者皆活

腫毒初起 百草鏡云此方傳自異人應驗如響  
重者不過三服輕者一二服初起卽散已成者自  
潰且易收口甲片炙搗六錢全當歸五錢花粉八  
錢白芷五錢廣皮三錢土貝母研二錢銀花一兩  
角刺三錢赤芍六錢防風五錢甘草節六錢乳香  
炙另研一錢沒藥炙另研一錢蘇木二錢川牛膝  
一錢川斷五錢酒水各半煎汁去渣將沒藥乳香  
末調服取汗忌雞犬孝服男女僧尼觸犯須避靜  
室服藥趙貢菽云此方專於攻散藥力太重惟可  
施於壯實之人虛弱者勿服



按貝母有甜苦之分有川象之別百草鏡云出川者曰川貝出象山者名象貝絕大者名土貝川產者味甘間有微苦總不似他產之一味苦而不甘者也入藥能補氣利痰而不寒虛人宜之象貝一味苦寒能化堅痰性利可知若土貝功專化膿解癰毒性燥而不潤以象貝皆小土貝獨大於川產者亦異綱目不分著功用或其時尙未有此種耳又用藥識微云川貝中一種出巴東者獨大番人名紫草貝母大不道地出陝西者各西貝又號大貝張石頑云貝母川產味甘最佳西產味薄次之

象山者微苦又次之一種大而苦者僅能解毒並  
去心用今川中亦產一種大如錢者土人以之擣  
粉作漿刷川綱用不知入藥然則土貝川中亦產  
不特浙江也憶庚子春有友自川中歸貽予貝母  
大如錢皮細白而帶黃斑味甘云此種出龍安乃  
川貝中第一不可多得信是則川中之甜貝母亦  
有大者不特金川子獨甜也並附以俟考

草棉

綱目木棉下注云棉有二種似木者名古貝今訛  
爲吉貝似草者名古終今俗呼棉花乃草棉也接

代醉編棉花種爲番使黃始所傳宋末始入江南  
沈黃門炤曰番中有青黃白三種今特傳其白者  
耳不知江浙草棉多種藝而木棉罕見卽草棉中  
亦有黃色者不盡是白者入藥以白爲勝綱目有  
棉花油不言花及子功用悉爲補之

百草鏡云花可止血殼可治膈 隔食膈氣用棉  
花殼八九月採不拘多少煎當茶飲之三日卽愈  
忌食鵝

藥性考云草棉甘溫禦寒卻冷燒灰止血凍瘝敷  
穩子熱補虛煖腰治損而毒昏目塗癬疥等

子 性熱味辛 治腸風救生苦海棉子丸取棉花子炒黃黑色去殼爲末用陳米濃汁加黑砂糖爲桐子丸每日空心時滾水下三錢服至三觔斷根。腸紅秘方集驗棉子炒爲末用白糖拌米湯和服。血淋不止許氏方炒燥爲細末三白酒送下二錢立止。白帶沙淋救生苦海調經門香附散中用棉子仁。赤白帶下百草鏡棉花子炒黑去殼爲末米糊丸每服三錢赤帶用砂糖湯下白帶用白糖湯下。種子最妙方用棉花子砂糖各三錢沖酒服。薰洗痔傳信方鬼饅頭棉花子烏

菱殼鳳尾草等分煎湯先熏後洗如疼加乳香麝  
加楊柳鬚或木稜藤○又方用棉花子同槐樹梗  
葉煎湯洗熏自愈○下血血崩不止百草鏡棉花  
子燒灰存性酒下立止○便毒濟世方用棉花子  
瓦煨存性爲末每日空腹酒下二錢連服三次全  
消兼治血崩○陽痿不起祝氏效方棉花子水浸  
曬乾燒酒拌炒去殼用仁半觔破故紙鹽水炒韭  
菜子炒各二兩爲末葱汁爲丸梧子大每服二錢  
空心酒下○痢疾救生苦海棉花子仁新瓦炒去  
油焦研細每服二錢紅馬燈心湯下白用好陳酒

下○癩痺棉花瘡集驗用棉花子一斗燒酒拌和炒燥去灰再拌再炒以黑爲度去殼再抄擣爲末用砂糖調和每服三錢服過一升許卽愈○除壁蝨易堂驗方硫黃末拌棉花子燒烟薰二三次卽絕○中風口眼喎斜便易良方用棉花子炒黑爲末乳香末三錢紅糖二兩飯後黃酒送下卽愈○腸風下血不藥良方生柿子二個竹刀切去蒂核以棉花子塞入柿內仍蓋好瓦上煨存性研細末米飲熱調服重者三服全愈○穀道生瘡俗呼偷糞老鼠不藥良方用棉花子炒去殼磨粉每早中

晚三次打糊服一碗半月全愈○治腎子大小偏  
墜回生集棉子煮湯入麩將腎囊坐入麩口俟湯  
冷止一二次散其冷氣自愈○癱瘓諸風醫學指  
南乳香沒藥各三錢棉花子白糖各六錢爲末黃  
酒化服出汗愈○風蟲牙疼家寶方用韭菜子黑  
核桃肉棉花子各一兩分爲末醋糊丸火酒浸咬  
在疼處卽止○痔漏家寶方用棉花子仁六兩烏  
梅六兩共搗爛爲丸桐子大早晚每服三錢開水  
送下服完卽愈○經水過多不止慈航活人書棉  
花子瓦器炒盡烟爲末每服二錢空心黃酒下○

小便血劉羽儀經驗方用棉花子炒枯存性爲末  
熱火酒調服七後在左腳大指節上有毛處以豆  
大艾丸將火灸之卽止○盜汗不止劉氏驗方棉  
子仁三四錢每日煎湯一碗空心服三四日卽止  
○腸風○腸紅下血垂危德勝堂方准棉花核一  
升槐米七錢用天目芽茶四兩泡汁將二味炒燥  
入茶汁內復泡又炒如此數次汁乾爲度磨末每  
服三錢空心酒調下三日立愈○治牙宣蘭臺軌  
範用棉花核煨灰擦○治吹乳郎興祖方棉花子  
一兩打碎酒水同煎服○治陰囊腎子腫大方集



驗棉花子仁煎湯洗之自愈。○血崩龔雲林萬病回春用棉花子仁炒黃色甘草黃芩等分爲末每服二錢空心黃酒下。○又集驗良方用陳棕棉花子二味燒灰存性黃酒送下卽止。○虛怯勞瘵久嗽吐血不止集效方棉花子不拘多少童便浸一宿爲末每服一錢側柏葉湯下諸藥不效此方甚驗酒調服治血崩。○集聽云棉子仁止血不寒凡血症及婦人經病帶下崩淋醋炒七次用。○心疼腹痛集聽用側柏葉米泔水浸三日日易水一次曬乾炒黑棉子仁末一觔配柏末八兩如熱甚者

對配○種子方集聽棉子仁淨肉四兩燒酒拌曬  
三次熟地二兩枸杞一兩兔絲子破故紙茯苓山  
藥陳皮五味子連翹何首烏各一兩蜜九鹽湯空  
心服四錢○痔漏管周氏家寶方棉花子仁炒急  
性子炒苧麻子仁炒各等分爲末每服三錢空心  
好酒下輕者半月重者一月管自退○出血不止  
家寶方棉花子燒灰存性爲末敷之○崩帶家寶  
方陳連蓬燒灰存性五錢棉花子肉燒灰存性三  
錢共一服無灰酒調下

治痰火後半身不遂筋骨疼痛 核桃仁棉花子

仁杜仲炒巴戟砂仁骨碎補枸杞子續斷牛膝各  
二兩大蝦米四兩兔絲餅四兩用燒酒二十觔煮  
服如年高者加附子肉桂各一兩酒服完將渣曬  
乾爲細末煉蜜爲丸每服二錢酒送下

打老兒丸 良朋彙集方久服延年卻疾棉花子  
一觔炒去殼核桃肉四兩打爛用小米麵打糊爲  
丸重三錢滾湯服

仙傳蟠桃丸 臥雲山人傳大有補益治諸虛百  
損棉花子取淨仁乾燒酒拌透下用黃酒水平對  
蒸一炷香紅棗用黃酒煮熟取淨肉各一觔歸身

牛膝枸杞俱用酒浸肉蓯蓉酒洗去泥甲山茱萸酒潤去核兔絲子酒蒸成餅白魚臛麩炒成泡白茯苓人乳拌蒸故紙鹽水炒熟地酒煮如飴以上藥各四兩淨巴戟酒洗去心五兩共爲細末煉蜜爲丸三錢早晚酒水任意送下

棉花子丸 年希堯集驗良方云烏鬚煖腎種子陽虛人宜此用棉花子十數筋用滾水泡過盛入蒲包悶一炷香取出曬裂殼口取仁并去外皮用淨仁三筋壓去油淨用火酒三筋泡一夜取起蒸三炷香曬乾故紙一筋鹽水泡一夜炒乾川杜仲

一觔去外粗皮黃酒泡一夜曬乾薑汁炒去絲枸  
杞子一觔黃酒浸蒸曬乾兔絲子一觔酒煮吐絲  
爲度共爲末蜜丸桐子大每服二三錢

長春丸 治腎虛精冷之症集驗良方魚鱉一觔  
蛤粉沙成珠極焦棉花子取淨仁一觔去油淨酒  
蒸白蓮鬚八兩金櫻子去子毛淨一觔金釵石斛  
八兩炒蒺藜四兩枸杞子四兩五味子四兩炒鹿  
角五觔鋸薄片河水煮三晝夜去角取汁熬膏和  
藥末爲丸桐子大每服三錢

健步仙方 凌雲集棉花子仁一觔淨肉用燒酒

三觔炒乾枸杞子四兩酒浸杜仲四兩鹽酒煮炒  
兔絲子四兩酒炒歸身二兩破故紙四兩酒洗炒  
胡桃仁四兩共爲末煉蜜爲丸桐子大每服三錢  
空心滾湯下

### 紫草茸

葉大椿痘學眞傳云紫草茸古本不見近刻但在  
紫草項下註明紫草茸染手者爲佳竟不知別有  
一種予幼時見世叔華泓卿家有紫草茸爲發痘  
神丹乃其高祖學士鴻山公使外國帶歸者予取  
而藏之每遇血熱毒壅失血煩悶頂陷不起痘疔

腫脹於清解藥中研加四五分無不神效惜乎方書不載不敢擅增本草近見神應心書獨標紫草茸色澹紅出烏思藏着大樹枝上如白蠟其價如千金不特發痘如神用酒調服一二錢能治諸腫毒惡瘡又云順手搯一錢酒下力能催生此漱水譚應夢屢獲其效併請正西番貢僧之語至近時亦知茸非紫草之嫩苗復誤認胭脂渣卽是紫草茸此說更謬○按紫草本草諸方皆用根韋宙獨行方治豌豆瘡不發煮紫草湯飲後人相承用之則以之治痘涼血解毒自此始也曾世榮活幼新

書云紫草性寒小兒脾氣實者猶可用脾氣虛者反能作瀉古惟用茸取其初得陽氣以類觸類所以用發痘瘡則用茸亦見於此而亦未聞有烏思藏所出一種據葉所云又似紫鉚亦無的解以其親試歷效故存其說以俟後之博訪

治痘及諸腫毒惡瘡催生

己亥冬遇劉挹清少府於餘杭言其祖曾任蜀藩家有西藏紫草茸皆成塊如指頭大色紅而明透如琥珀知葉所載爲不謬

翟良痘科釋義云痘科用紫草古方惟用其茸取



氣輕味薄而有清涼發散之功凡下紫草必用糯  
米五十粒以制其冷性庶不損胃氣而致泄瀉惟  
大熱便秘者不必加

獨腳連

獨腳一枝連

八角連

粵西偶記生廣西草如黃連根極大持入藥肆則  
諸藥香氣盡消爲真三腳五腳者次之

百草鏡此藥產廣東根大如拳春月發苗經霜雪  
則死若善藏過冬則來年宿根復發苗高尺許葉  
大如杯宛似荷葉色綠柔厚莖有細毛六七月起  
莖莖有白毛開花微垂似山蘭而小其色微紅

稗史鄱陽山間生一種草始萌芽時便似蓮蓬俗呼爲獨腳連移植於居宅隙地及園圃中蛇虺不敢過其下王季光宅後榛莽叢中有蛇穴常出爲人害乃種此草數本於穴外自是其患不作至暑月間穴內臭甚使園丁掘土訪求得死蛇十數蓋爲草氣所熏潰也又一小蛇來到草傍立化爲水矣。采藥錄獨腳黃連苗葉如土大黃面青背赤根直色黃此草根下有赤練蛇數條者方是

按綱目鬼臼亦名獨腳蓮無治疔之說至集解下註形狀又小有異同故仍爲補之庚戌予在臨安

有醫士盛天然言其地古城與餘杭接界產獨葉花生山坑不見天日其形一葉中含紅花一朶儼如蓮花狀其花從葉心透出下有根作獨蒜狀其花葉聞人聲輒縮入根內不可見遇之者記其處掘之亦止有根其葉與花雖剖根覓之亦無形迹倘得之者不論何等毒蛇咬以根擦摩蛇毒卽盡如有誤服蛇變驚者以少許煎湯服之卽瘥併能解一切毒蟲咬螫一切蠱毒草本毒咽喉一十八症皆驗如神凡人鼻發紅色生疥癩掀癢異常名曰痧蟲食鼻以此根磨塗立愈此乃天生神物有

山行遇之者不論持何物先擲之以鎮住然後再掘卽不能遁形凡生獨葉花地四圍約尺許無草其上不可手取亦勿以鐵刀取須用竹刀掘取則不傷根蓋此草蛇最喜蟠其旁凡蛇咬人亦中人毒必退殼若覓此物臥其旁一宿則人毒解可免退殼之患大毒蛇都喜蟠其根旁故土最毒近人手則手爛然得其根反能解百種大惡蛇毒丐者覓此以爲得寶云

治疔腫癰疽以根或醋酒磨塗葉貼癰腫能消

治蛇咬 祝氏效方用獨葉一枝花生溪灘浮土

上根如鼠糞用根口嚼搽瘡上

退疔奪命丹 萬病回春云此丹專治疔瘡防風  
八分青皮七分羌活獨活黃連各一錢赤芍六分  
細辛八分僵蠶一錢蟬退四分澤蘭葉五分金銀  
花七分甘草節一錢獨腳連七分紫河車卽金線  
重樓七分右剉五錢先服倍金銀花一兩澤蘭一  
兩少用葉生薑十片同搗爛好酒斫熱泡之去渣  
熱服不飲酒者水煎亦可然後用酒水各一半煎  
生薑十片熱服出汗病退減後再加大黃五錢同  
煎熱服以利二三次去餘毒如有膿加何首烏白

芷梢在腳加檳榔木瓜要通利加青皮木香大黃  
梔子牽牛

獨腳一枝蓮

百草鏡山間有之二三月苗發生菅茅俗名乾苳  
叢中獨莖無葉高尺許莖細強青白色莖端有一  
疙瘩至晚秋時疙瘩生花額蓮其根與黃麻根相  
似

治疔腫癰毒流注

八角蓮

搗礮小品綬甯產之可以伏蛇諺云識得八角蓮

可與蛇共眠

治一切毒蛇傷

按瀕湖綱目有鬼臼亦治毒蛇傷 鄭樵通志云八角盤卽鬼臼今人所謂獨腳蓮是也或粵語類舉其名呼爲八角蓮未可知附存俟考

汪連仕草藥方八角盤起金星名金星八角嬰兒取爲獨腳蓮俗呼獨葉一枝花根如赤朮多眼如馬目今人呼馬目奪公消一切毒力能軟堅透膿

露花粉

粵志露花生番禺蓼漏狀如菖蒲其葉節邊有刺

葉落根以火煨之成枝幹而多花花生叢葉中其  
瓣大小亦如葉而色瑩白柔滑無芒刺花抱蕊心  
如穗朝夕有零露在苞中可以解渴又有粉可入  
藥其生於他土者蕊落結子大如瓜曰路頭花多  
不香惟露花盛夏時露花始熟以花覆盆盪曬之  
香落茶子油中其氣馥烈是曰露花油蓼涌及增  
城人善爲之遲開者曰寒花香益情徹不可爲油  
其生東安山中者叢卑葉小自春至秋皆花近水  
者尤香亦不可爲油

塗兒女肌膚止汗



通血香

出西洋色如乾醬 百草鏡云出陝西羊城客帶  
至杭貨賣

治血症及肝血氣入藥最良

臑脹 救生苦海通血香一錢取亞腰葫蘆一個  
不去子膜入香於內再入酒煮仍以所開之蓋合  
縫封固以陳酒安鍋內懸葫蘆於酒中揆定勿令  
傾倒將鍋蓋密煮三炷線香爲度煮時其香透屋  
墻之外煮完取出葫蘆內子膜并藥烘乾爲末每  
服一錢空心時酒下間五日再服一錢服盡葫蘆

內藥服五六錢卽愈此方出廣筆記云治脾虛有濕者

療癰 良朋彙集有治療癰內消方紫背天葵一兩五錢海藻海帶昆布各一兩海螵蛸五錢貝母桔梗各一兩通血香三錢右藥爲細末酒糊爲丸桐子大每服七十九食後溫黃酒送下

痔漏通腸 海藥秘錄胡連追毒方專治痔漏不拘遠年近日有漏或通腸及汚泥孔出者先用此方迫盡膿血後服黃連閉管丸取效最穩用胡黃連八錢切片薑汁拌炒刺蝟皮一個切片炒黃爲

末通血香八分須用真者研末麝香二分共和勻  
軟飯爲丸麻子大每服一錢食前酒下服藥後臆  
水反多乃藥之功勿懼可也

黃連閉管丸 胡黃連淨末八錢甲片麻油內燻  
黃五錢石決明煨過五錢真通血香六分不可少  
槐花五錢共爲細末蜜丸麻子大每服一錢空心  
清米湯下早晚二服重者二十一日收功此方不  
用刀針挂線之苦誠起廢之良方也如漏邊有硬  
肉突起者加蠶繭二十一個炒末和入此方及遍  
身諸漏並治屢試屢效

藏連丸 治痔漏無論新久但舉發便下血作痛  
肛門墜重者膿血不止腫痛難坐者並治胡黃連  
淨末八兩通血香錢半用雄豬大腸盡頭一段長  
一尺二寸溫湯洗淨將連末及通血香灌入腸內  
兩頭以白絲線扎緊煮酒二斤半新砂鍋內煮酒  
將乾爲度取起腸藥各搗如泥倘藥爛曬一時復  
搗爲丸桐子大每服七十九空心溫酒送下久服  
除根又名白銀定子治漏有孔者只須半月見功  
神效

三品一條鎗 白砒淨末一兩白礬淨末二兩明

雄黃二錢四分通血香八分乳香一錢二分先將  
砒礬研極細末鐵杓鎔成餅入炭火煨烟淨取出  
去火毒爲末和入雄黃血香乳香細末作錠子成  
條插入漏內直透裡痛處爲止每日上三次至七  
日爲止半月瘡結而愈如痛未痊用生肌散收口  
可也○生肌散治諸痔諸瘡腫毒收口神速大妙  
乳香沒藥海螵蛸用三黃湯煮過寒水石煨過輕  
粉龍骨煨赤石脂煨冰片各等分共研細末參思  
處外貼膏藥

野馬豆

出西藏乃番僧撚草末合成如豆形故名王怡堂云藏中出一種草彼土人呼爲野馬草番僧擇日採之研爲細末置淨器中供佛前更擇日合和爲藥其合藥之日率彼土男婦皆於佛前誦咒以所和草末研爲丸男丸者爲雄婦丸者爲雌藥亦分雌雄形雄者丸上有小圓凸雌者作長凹色有紅有黑皆如菉豆大丸畢仍置淨器中必須雌雄合在一處一二日能生出小豆如麻子屑飼以藏紅花間日視之紅花漸少則新生之豆漸大久則又生小豆以此生生不息亦一異也如攜帶遠方無

藏紅花豆亦不死惟不能化生小豆耳。西寧人  
曾玉瀛言野馬豆又呼嘛呢子如半粒菘豆大藏  
中人得此豆每日輒誦唵嘛呢叭嚩吽六字數百  
遍九豆時亦口念此六字故名能治胃氣心痛惟  
瘡痘瘡疾忌服以其善於長化顛倒陰陽也。馬  
少雲衛藏圖識藏中有子母藥大哉可菘豆以哈  
達潔裹之經時小粒漸增有子母相生之義傳達  
唵喇嘛默持佛咒以糴粃搓成者故以奇異著按  
此卽野馬豆也。朱排山柑園小識喇嗎嘗聚會  
以米麥數粒置瓶中四人守之誦唵嘛囉叭呢吽

六字咒飲食則代無間晝夜四十九日有紅子滿  
瓶中。大如芥子。色似硃砂。謂之嘛嚩子。佩之能辟  
邪致祥。小兒食之稀痘。○壬子予從戚友處覓得  
嘛嚩子數十粒。以玻璃盆貯之。形勻圓儼似急性  
子。而色紅。據云初得時色不甚紅。苦無藏。紅花卽  
市本地河南所產紅花。研屑拌之久。則色紅如硃  
砂。平瑤海先生偶得西藏嘛嚩子數十粒。一時無  
玻璃器。乃卽置紙裏中。供佛前。日誦文殊六字真  
言數百遍。其子能忽多忽少。又能透出紙裏。外變  
幻不常。異之以告客。客曰。此物性成本得西僧咒



力其造子之法今都中喇嘛亦能爲之每四月八日大小喇嘛輒羣聚佛前選高行持誦者數十人鑊鈴法鼓宣揚六字真言七晝夜其丸卽用乾麩手搓如粟米大口念手丸以金盆貯之丸時得咒力粒粒皆能自飛或在窗櫺或在案格堆結團聚俟七晝夜滿後其不能飛者去之其飛者用箒掃下以送諸王大臣名喇嘛子可治諸疾變幻多寡蓋自其成性已然無足異也入藥以西藏合者佳癸丑冬在上虞署晤平司馬少君萊仲言曾隨任中甸其地係西藏要路有喇嗎等彼地呼野馬豆

爲舍利子有草木佛三種彼土富人死必納一粒口中云入冥生光土人有病亦輒服之○金御乘言慈谿有患耳聾者其家有藏中帶來嘛咍子取服三粒忽聞兩耳中大聲一震轟然如掣去數百觔物者嗣後耳更聰甚其人一日忽眠食妓家次日復聾如故再服亦無效矣

味微辛性平治百病彼土無藥有病卽服此豆

### 夏草冬蟲

出四川江油縣化林坪夏爲草冬爲蟲長三寸許下跖六足脰以上絕類蠶羌俗採爲上藥功與人

參同。從新云產雲貴冬在土中身活如老蠶有毛能動至夏則毛出土上連身俱化爲草若不取至冬復化爲蟲。四川通志云冬蟲夏草出裡塘撥浪工山性溫煖補精益髓。黔囊夏草冬蟲出烏蒙塞外暑茁土爲草冬蟄土爲蟲。青藜餘照四川產夏草冬蟲根如蠶形有毛能動夏月其頂生苗長數寸至冬茁槁但存其根嚴寒積雪中往往行於地上。文房肆考邇年蘇州皆有之其氣陽性溫孔裕堂述其弟患怯汗大泄雖盛暑處密室帳中猶畏風甚病三年醫藥不效症在不起適

有戚自川歸遺以夏草冬蟲三劬逐日和葷蔬作  
餽燉食漸至愈因信此物保肺氣實腠理確有徵  
驗用之皆効○七椿園西域聞見錄夏草冬蟲生  
雪山中夏則葉岐出類韭根如朽木凌冬葉乾則  
根蠕動化爲蟲入葉極熱○徐后山柳崖外編冬  
蟲夏草一物也冬則爲蟲夏則爲草蟲形似蠶色  
微黃草形似韭葉較細入夏蟲以頭入地尾自成  
草雜錯於蔓草間不知其爲蟲也交冬草漸萎黃  
乃出地蠕蠕而動其尾猶簌簌然帶草而行蓋隨  
氣化轉移理有然者和鳴肉顛食之大補紹興平

萊仲先生言其尊人曾任雲南麗江府中甸司馬  
其地出冬蟲夏草其草冬爲蟲一交春蟲蛻而飛  
去土人知之其取也有期過期無用也○朱排山  
柑園小識春蟲夏草生打箭爐春生土中如蠶夏  
則頭上生苗形長寸許色微黃較蠶差小如三眠  
狀有口眼足十有二宛如蠶形苗不過三四葉以  
酒浸數枚啖之治腰膝間痛楚有益腎之功以番  
紅花同藏則不蛀或云與雄鴨同煮食宜老人  
潘友新云粵中鴉片丸用夏草冬蟲合鴉片人參  
合成乃房中藥也此草性更能興陽則入腎可知

甘平保肺益腎補精髓止血化痰已勞嗽治喘症  
皆良從新味甘性溫秘精益氣專補命門藥性考

按物之變化必由陰陽相激而成陰靜陽動至理也然陽中有陰陰中有陽所謂一陰一陽互爲其根如無情化有情乃陰乘陽氣有情化無情乃陽乘陰氣故皆一變而不復返本形田鼠化鴛鴦化田鼠鳩化鸞鷟化鳩悉能復本形者陽乘陽氣也田鼠化丹砂斷松化爲石不復還本形者陰乘陰氣也夏草冬蟲乃感陰陽二氣而生夏至一陰生故靜而爲草冬至一陽生故動而爲蟲輟轉循運

非若腐草爲螢陳麥化蝶感溼熱之氣者可比入藥故能治諸虛百損以其得陰陽之氣全也然必冬取其蟲而夏不取其草亦以其有一陽生發之氣可用○張子潤云夏草冬蟲若取其夏草服之能絕孕無子猶黃精鉤吻之相反殆亦物理之奧云周兼士云性溫治蟲脹近日種子丹用之

敬老鴨法○用夏草冬蟲三五枚老雄鴨一隻去肚雜將鴨頭劈開納藥於中仍以線紮好醬油酒如常蒸爛食之其藥氣能從頭中直貫鴨全身無不透浹凡病後虛損人每服一鴨可抵人參一兩

綿絮頭草

一名金沸草一名地蓮俗呼黃花子草生郊野立  
春後發苗葉多白毛似綿絮至立夏開黃花一莖  
直上花成簇處處山坂有之鄉人初春採其葉揉  
粉作饑食清香堅韌最適口此草形小布地生葉  
似慎火而薄摘之有白絲色青白本小如剪刀草  
○按綱目有鼠麴俗名毛耳朶葉有白茸又名茸  
母宋徽宗詩茸母初生認禁烟卽此蟻食此草卽  
醉故又名蚰蟬酒草然其功用亦止載其能治寒  
熱咳嗽去肺寒大升肺氣而已今別補其功用



味酸性熱多食損目治囊風溼癢煎湯洗愈兒疳  
梅瘡下疳同甘草煎洗

鴉膽子

一名苦參子一名鴉膽子出閩廣藥肆中皆有之  
形如梧子其仁多油生食令人吐作霜槌去油入  
藥佳

治痢 何夢瑤醫編鴉膽丸用鴉膽子去殼槌去  
油一錢文蛤醋炒枯礬川連炒各三分糊丸硃砂  
爲衣或鴉膽霜黃丹各一錢加木香二分亦可烏  
梅肉九硃砂爲衣二方俱丸棗豆大粥皮或鹽梅

皮或圓眼乾肉或芭蕉子肉包吞十一二丸止  
裏急後重 吉雲旅抄用鴉膽卽苦榛子去殼留  
肉包龍眼肉每歲一粒白滾水下

治痔 金御乘云近日閩中板客皆帶鴉膽子來

治痔如神有患者以子七粒包圓眼肉吞下立愈

至聖丹 治冷痢久瀉百方無驗者一服卽愈凡

痢之初起實熱實積易知而易治惟虛人冷積致

痢醫多不以爲意蓋實熱之症外候有身熱煩躁

唇焦口渴肚疼窘迫裏急後重舌上黃胎六脉洪

數證候旣急治者亦急輕則疎利之重則寒下之

積去而和其陰陽無不愈者至於虛人冷積致痢外無煩熱躁擾內無肚腹急痛有赤白相兼無裏急後重大便流痢小便清長此由陰性遲緩所以外症不急遇此不可姑息但以集成三仙丹下之以去其積倘不急下必致養虎貽患其積日久漸次下墜竟至大腸下口直腸上口交界之處有小曲摺隱匿於此爲腸穢最深之處藥所不到之地証則乍輕乍重或愈或發便則乍紅乍白或硬或溇總無一定任是神丹分毫無濟蓋積不在腹內而在大腸之下諸藥至此性力已過盡成糝糠安

能去此沉匿之積所以冷痢有至三五年十數年  
不愈者由此故也古方用巴豆爲丸下之者第恐  
久病人虛未敢輕用今以至捷至穩鴉膽子一味  
治之此物出閩省雲貴雖諸家本草未收而藥肆  
皆有其形似益智子而小外殼蒼褐色內肉白有  
油其味至苦用小鐵錘輕敲其殼殼破肉出其大  
如米敲碎者不用專取全仁用之三五歲兒二十  
餘粒十餘歲者三十多粒大人則四十九粒取天  
圓肉包之小兒一包三粒大人一包七粒緊包空  
一腹吞下以飯食壓之使其下行更藉此天圓包裏

可以直至大腸之下也此藥並不峻厲復不肚痛  
俟大便行時有白凍如魚腦者卽冷積也如白凍  
未見過一二日再進一服或微加數粒此後不須  
再服服時忌葷酒三日戒鴨肉一月從此除根永  
不再發矣倘次日腹中虛痛用白芍一枝甘草一  
枝各重三錢紙包水溼火內煨熟取起搥爛煎湯  
服之立止此方不忍隱秘筆之於書以公世用  
痢疾神方 醫宗彙編用白石榴燒灰一錢真鴉  
片切片二錢鴉膽子去殼紙包壓去油三兩人參  
三分枯礬二分海南沉香三分其爲細末調粥爲

九重五六釐曬乾磁瓶收貯紅痢用蜜一匙滾水調下紅白相兼陰陽水送下肚脹滾湯下水瀉米湯開水送下忌油膩腥酸一月

元寶草

生江浙田塍間一莖直上葉對節生如元寶向上或三四層或五六層此草有兩種一種兩葉包莖亦對節生一種獨葉莖穿葉心入藥以獨葉者爲勝○百草鏡元寶草生陰土近水處多有之穀雨後生苗其葉中濶兩頭尖如梭子形穿莖直上或五六層或六七層小滿後開花黃色氣性涼

辛寒百草鏡性涼補陰治吐血衄血跌撲閃腰挫  
疼癰毒

雀梅

一名爵梅葉如薔薇結實如梅而小 百草鏡云  
有一種山雀梅枝不蔓曲是樹不實亦有高大者  
按爵梅綱目主治蝕惡瘡外皆不載今復補其功  
用○綱目郁李下引詩疏云一名雀梅與此名同  
物異亦不言治癰毒

葉酸寒治乳癰便毒有奇效瀉熱解毒

鐵烏鈴

采藥書又名鐵鈴草其本色黑葉梗根堅實如鐵  
其汁黑可烏鬚

主治楊梅惡瘡風氣癱瘓損折筋骨俱煎酒服  
連仕方

### 孀酢草

俗名奶孩兒處處人家種之葉尖大如指甲有枝  
梗夏月開細紫花成簇結子亦細今人種於盆內  
婦人暑月採之插髮可辟臙腫

芳香辟惡去臭氣辛溫和中止霍亂吐瀉行氣活  
血發瘡者塞鼻能令寒熱漸輕



土當歸

荷包牡丹之根今人呼活血草卽土當歸也

汪連仕云用其根搗汁酒冲服之令人沉醉金瘡之聖藥也

開金鎖

從新云產江浙葉如草薺高三四尺根如首烏而無稜肉白色而無紋畧似菝葜而無刺

苦平祛風溼同蒼朮當歸治手足不遂筋骨疼痛  
鐵指甲

李氏草秘其草葉似指甲生墻脚塔岸石砌間

王安采藥方此草沿松樹上一名佛印甲一名寄  
生

治諸癰毒火丹頭面腫脹將危者少入皮硝搗罨  
之立愈 李氏草秘 牙疼煨末擦之立效 王安

雪裡青

荔枝草附

一名土犀角一名過冬青生田塍間葉如天名精  
而小布地生無枝梗葉有細白毛四時不凋雪天  
開小白花又荔枝草亦名雪裡青○百草鏡云雪  
天開小白花者乃過冬青三月起莖花白成穗如  
夏枯草有毛者名雪裡青

味苦大寒瀉熱治咽喉急閉搗汁灌之甚效

王氏驗方云能行上焦治腫痛散風火結滯咳血  
雪裡青根精猪肉切片層層隔開白酒淡煮至爛  
食之○肺痿雪裡青搗汁加蜜和勻作二次服每  
日服五七次七日全愈○齒痛雪裡青搗汁含痛  
處再用酒和服少許○痔雪裡青湯洗之○吹喉  
薄荷一兩雪裡青五錢加冰片三分爲末吹喉或  
吹鼻孔亦可○肺癰集效方雪裡青搗汁沖酒服  
之立效○黃雨巖云危篤肺癰痿症第一用雪裡  
青搗汁服如吐尤妙○治單雙蛾木蓮蓬雪裡青

根葉搗汁米醋滾過沖入煎汁含少許咽之吐出  
卽愈

荔枝草 一名皺皮蔥丹術家入爐火用○百草鏡  
云荔枝草冬盡發苗經霜雪不枯三月抽莖高近  
尺許開花細紫成穗五月枯莖方中空葉尖長面  
有麻纒邊有鋸齒三月採辛亥子寓臨安署中見  
荒圃中多此物葉深青映日有光邊有鋸齒葉背  
淡白色絲筋紋輟縱露麻纒凹凸最分明凌冬不  
枯皆獨莖一叢數十葉點綴砌草間亦雅觀也  
性涼涼血 葛祖遺方治咽喉十八症消癰腫楊

梅痔瘡

急驚 集聽荔枝草汁半鍾水飛過硃砂半分和  
勻服之立愈

小兒疳積 集聽荔枝草汁入茶盃內用不見水  
雞軀肝一個將銀針鑽數孔浸在汁內汁浮於肝  
放飯鍋上蒸熟食之即愈

喉痛或生乳蛾 救生苦海用荔枝草搗爛加米  
醋絹包裹縛筋頭上點入喉中數次愈

雙單蛾 集效方雪裡青一握搗汁半茶鍾滾水  
沖服有痰吐出如無痰將雞毛探吐若口乾以鹽

湯醋湯止渴切忌青菜菜油

痔瘡 活人書雪裡青汁炒槐米爲末柿餅搗丸  
如桐子大每服三錢雪裡青煎湯下

白濁 張棗漪傳方雪裡青草生白酒煎服

無名腫毒 葉天士效方雪裡青一握鮮者佳加  
金剪刀同搗爛入酒糟半鐘共搗敷不必留頭輕  
者自散重者雖出膿無妨

治鼠癩 經驗廣集用過冬青卽荔枝草又名天  
名精五六枚同鯽魚入鍋煮熟去草及魚汁飲數  
次愈

汪連仕草藥方鳳眼草卽荔枝草土人稱爲賴師  
草醫家名隔冬青涼血止崩漏散一切癰毒最效  
落得打

一名土木香山雄黃五香草從新云近處有之苗  
高尺許葉如薄荷根如玉竹而無節搗爛則粘。  
按從新所說似今人所名爲紫接骨者落得打子  
養素園中曾種之苗長二三尺葉細碎如蒿艾秋  
開小白花結子白色成穗纍纍如水紅花似白色  
耳故又名珍珠倒捲簾治跌打損傷神效曾記辛  
巳年小婢失足從樓梯墜下瘀血積滯因採此搗

汁冲酒服以渣罨傷處一飯頃疼塊卽散內瘀亦  
瀉出葉有清香者是此藥以家種隔二三年者入  
藥用良野產者入藥有草氣胃弱者服之多吐。  
百草鏡云此草立春後始發苗十月枯八月開花  
苗葉如菊艾有岐尖而薄五月採嫩枝入藥。李  
氏草秘七葉草一名落得打一名活血丹雖名草  
實樹其樹高一二尺九七尺不等搗汁和酒服治  
打傷撲損疔瘡腫毒煎洗痰核瘰癧久久自消敏  
按此言木本當又是一種。

甘平治跌打損傷及金瘡出血並用根煎服或搗



本草綱目卷之七  
敷之不作膿

葛祖方治跌打損傷無名腫毒去瘡瘀血死肉不痛

百草鏡云性甘香溫入脾經去風調氣活血

花 擦牙疼治頭風及風氣

苦花子

一名毛連子又名小葉金雞舌又名苦花椒入藥梗葉並用

治疔瘡瘰癧毒虵傷熱腹痛熱喉風並效搗汁搗水  
夏冷服冬溫服

佛手草

朱煥齋任城日鈔杭州秦亭山聖帝殿廚房後石臺基上有草狀如百合名百合草一名佛手草寺僧藉以貨售香客以入藥

治瘡不論何種惡瘡以此草煎湯洗之卽愈敏按王安采藥方射干一名佛手草不治瘡與此別

草石蠶

餘杭山中多有之葉似大葉金星根黑色如蠶○

按甘露子亦名草石蠶與此別○前溪逸志銅官山生石蠶藤也以石爲土形則蠶也採食之可已

本草綱目卷五  
風痺。○本草石蠶乃石似蠶者非真蠶也。藤之蠶根於石石之蠶伏於土非格物君子焉能辨其名號識其性情哉。

治虎傷收口用之虎咬成瘡口不斂者爲末摻上卽癒。風痺羊毛癩。

敏按王安采藥方金星鳳尾卽寶劍草其根名石蠶能解硫黃毒蛇毒治發背癰疽結核等症竹木魚刺黃疸熱淋洗眼疾陰溼瘡似此則非藤蠶甘露子明矣。

毛葉仙橋 猫舌仙橋附

一名翠梅草百草鏡云春月發苗葉狹尖糙澁微有毛三月開花碧色至五月間其莖蔓延黏土生根兩頭如橋故名三月採去根

性寒 葛祖方治失力黃能退諸瘡熱血風火氣毒。百草鏡云散風火利溼熱治白火丹疥瘡溢精。白濁用毛葉仙橋三錢酒煎服

李氏草秘仙橋草形似橋倒地生根葉似椰厚背紫色者多秋開紫花一條治疔瘡諸毒癰腫用此草搗汁加酒服雖發狂垂死入口卽生。汪連仕云細葉者紫背仙橋背必須紫色延蔓倒地如橋

土人名爲疔瘡草能消疔腫拔根合蒼耳草酒煎服

貓舌仙橋

汪氏草藥方貓舌仙橋葉面生刺草本揚地生花青紫多產水澤旁

治疗瘡理黃疸一切溼火

汪氏

荷包草

一名肉餛飩草一名金鎖匙生古寺園砌石間似地連錢而葉有縐紋形如腰包青翠可愛。百草鏡云二月十月發苗生亂石縫中莖細葉如芡實

大中缺形似挂包餛飩故名蔓延貼地逐節生根  
極易繁衍山家階砌亂石間多有之四月十月採  
過時無

性微寒治黃白火丹去溼火兼神仙對坐草用○

清五臟點熱眼止吐血洗痔瘡調婦人經忌鹽

水腫初起 百草鏡云活鮑魚大者一尾用磁片

割開去鱗及腸血以紙拭淨勿見水以荷包草填

腹令滿甜白酒蒸熟去草食魚

利溼熱治黃白疔臃脹白濁經閉搗汁點熱眼前

湯洗痔瘡腫痛 百草鏡

疝氣 周氏家寶用荷包草研爛汁酒送服此草形似荷包上面有二子初生時有葉無子須至六七月方生

黃疸 家寶方荷包草螺螄三合同搗汁澄清煨熱服

眼中生疔 眼科要覽用肉餛飩草連根葉和酒漿板搗汁飲二三次卽愈

酒漿板卽酒釀糟也

蛇咬 家寶方鶴頂紅卽灰藿肉餛飩野甜菜三味共搗敷之

鼠牙半支

生高山石壁上立夏後發苗葉細如米粒蔓延絡石其根嵌石罅內白如鼠牙百草鏡載各種半支有七十二種此爲第一。百草鏡鼠牙半支二月發苗莖白其葉三瓣一聚層積蔓生花後卽枯四月開花黃色如瓦松

性寒消癰腫治溼鬱水腫

治諸毒及湯烙傷疔癰等症蟲蛇螫咬 蔣儀藥鏡拾遺賦半枝蓮解蛇傷之仙草

半枝蓮飲 百草鏡云治一切大毒如發背對口冬瓜騎馬等癰初起者消已成者潰出膿亦少鼠



牙半支一兩搗汁陳酒和服渣敷齒頭取汗而愈  
章南聞試效

狗牙半支 虎牙半支附

生陰溼地立夏前發苗葉尖細作品字式層覆而  
生夏至時開花黃色類瓦松花後即死其年雨水  
多其草必茂葉大者曰虎牙

治癰疔便毒黃疸喉癬 救生苦海用狗牙半支  
搗汁加陳京墨磨汁和勻漱喉日咽四五次甚者  
半月愈。天蛇頭疼不可忍醫宗彙編用半支連  
同香糟搗爛少加食鹽包住患處疼即止

虎牙半支 功同

汪連仕采藥書虎牙半支性寒涼無毒葉片大者  
羊角半支葉扁大者馬牙半支俱生陰山谷中

治疔腫火毒痔漏神效

馬牙半支

一名醬瓣半支鐵梗半支又名山半支生石壁上  
葉大叢生圓如醬中豆瓣故名○百草鏡云醬瓣  
半支又名旱半支葉如醬中豆瓣生石上或燥土  
平隰皆有之蔓生二月發苗莖微方作水紅色有  
細紅點子經霜不彫四月開花黃色如瓦松山左

人以爲茶茹。○江獻祥云此有二種有紅梗青梗之別治婦人赤白帶第一妙藥赤帶用赤梗者白帶用白梗者採得搗汁半酒盞酸迷迷草亦有赤白二種赤帶用赤者白帶用白者搗汁半酒盞和勻加紹酒半盞煮熟一服卽止永不復發

性寒消癰腫治溼熱利水和血腸癰痔漏

治蛇咬疔疽便毒風痺跌撲黃疸擦汗斑尤妙。○

百草鏡跌撲用醬瓣半支一握搗汁陳酒和服

絕瘡 家寶方醬板豆草六月六日雞鳴時采略

洗蒸熟一日曬乾不乾焙之每一觔配老薑一觔

磨細收貯一日者一錢二日者二錢三日者三錢  
酒調服服後飲酒至醉爲妙合時忌雞犬婦人見  
之神效

狗咬 以酒洗淨瘡口血搗醬板半文罨上一二  
日卽痂而愈 王小靜試驗

瘰癧 金養淳云馬牙半支作茶常服多年瘰癧  
皆消屢試屢驗

治急痧 用醬瓣草陰乾每服三錢水煎服

治淋疾 奇方類編用芝麻一把核桃一個石上

馬牙半支共搗滾生酒沖服

治水腫 汪連仕云取舊瓣草搗合麝香貼臍眼  
如人行五里其水卽下

狗尾半支

百草鏡云生頽垣墻側人家荒圃中尤多俗呼狗  
尾草葉如茅六月開花形如狗尾採取花莖下截  
陰乾用綱目狗尾草下止載穿疣目去赤眼惡血  
而不言別功用故爲補之

治疔癰癰面上生癰取草數莖揉軟不時搓之卽  
愈

風粟癩疹 狗尾草莖刮出瘀血避風數次自效

見杭集三方

羊毛癩 家寶方一名羊毛痧以狗尾草煎湯內服外用銀針挑破紅瘰用麻線擠出瘰中白絲如羊毛狀者卽愈否則脹死

金雞獨立草

散喉風 採藥志云散喉癰之聖藥

敏按此卽翠羽草宜併

神仙對坐草

一名蜈蚣草山中道旁皆有之蔓生兩葉相對青圓似佛耳草夏開小黃花每節間有二朶故名按

外科全生云此草梗葉長青經冬不衰殊不知春  
生秋死不衰之說謬矣○百草鏡云此草清明時  
發苗高尺許生山隰陰處葉似鵝腸草對節立夏  
時開小花三月採過時無○王安采藥方一名地  
蜈蚣

黃疸初起又治脫力虛黃○百草鏡用神仙對坐  
草三葉白荷包草平地木茵陳各三錢水煎分三  
服早中晚下一服全愈脫力虛黃五劑

祝氏效方洞天仙草膏用之又毒蛇咬搗此草汁  
飲以渣罨傷口立愈

一切疝氣 劉羽儀驗方仙人對坐青木香二味  
搗汁沖酒服之立效

治反胃噎膈水腫鼓脹黃白火疸疝氣陰症傷寒  
王安

紫羅襪

白花者良產溪澗者尤佳其根入藥不可多服令  
人吐瀉傷胃氣

治臃脹腫滿清利水道土產者治跌打損傷取根  
搗酒服少許 汪連仕採藥書

龍鬚草

野席草 烏龍鬚



一名又雞草綠袍草鐵線草鐵線筒人字草似扁  
蓄而小細圓與綱目石龍芻別。百草鏡云生山  
澤穀雨後發苗與野蓆草相類但蓆草之葉直上  
此草橫生布地小滿時抽莖開花青細。德勝堂  
傳方棒槌草亦名了雞草治跌打。汪連仕方既  
人以此織席有石龍芻草龍芻之名後訛芻爲鬚  
土產者卽又雞草又名鹿跑草治一切瘡疥至眞  
織席龍鬚其性溫和散風火大理溼熱

治口咽諸毒火症牙痛

野蓆草

生山澤水旁較席草稍短細亦名龍鬚草清明後  
生苗小滿時開花細小根類竹根黑色入藥取根  
用

止血崩風氣疼痛鶴膝風夢遺酒煎服湯煎洗出

并

草藥鑑

利溼熱治癰淋精濁崩中溼痺鼻衄疔

腮明目疔痛口咽諸毒火症鶴膝風

百草鏡

瘰癧

痰核

王用子

鼻中不時出血野蓆草根煎服

一盤

珠

齒牙疼痛動搖欲落者。仁惠方用野蓆草根煎  
湯代茶服一二日牙疼自止永不再發齒牙動搖

本草綱目卷之五  
者亦堅固如石

烏龍鬚

徐一士云有鄉人行野田中見老烏柏樹上挂生  
細長草一叢如燈心狀下垂一道士指謂曰此名  
烏龍鬚乃五福星所照在樹而生此取曬藏之可  
治痼疾一切血症鄉人如其教後用頗驗

治癰腫一切血症勞瘵

眞珠草

與茶部眞珠茶異

臨症指南云珍珠草一名陰陽草一名假油柑此  
草葉背有小珠晝開夜閉高三四寸生人家牆脚

下處處有之癸亥子寓西溪看地見山野間道旁  
有小草葉如槐而狹小葉背生小珠如鳳仙子六  
纍纍直綴經霜輒紅詢土人皆不識偶歸閱指南  
始悟此卽眞珠草也薄暮取視其葉果閉

治小兒百病及諸疳瘦弱眼欲盲皆效爲末白湯  
下或蒸煮魚肉食

指南

### 九龍草

百草鏡云生石上蔓延丈餘節處生根苗頭極多  
葉絨細青色又名九頭獅子草又名金釵草按綱  
目九龍草僅於雜草內附見而所引楊清叟外科

方一條述其苗葉尙是此草至云生紅子如楊梅則誤矣

性溫行血脈治風痺跌撲損傷雙單蛾痛風

奶癰 家寶方九龍草搗同醬板罨

除臭蟲 經驗廣集取九頭獅子草放牀四角每角用二三顆置草薦下任其自乾去臭蟲神妙

紅白蛇纏 王氏秘方九龍草焙存性麻油調搽

周氏家寶治毒蛇咬用九龍草搗汁半碗雄黃二錢酒冲服痛止此草生紅子如楊梅樣搗汁亦可治喉痛按此則楊清叟外科所載形狀同或名同

物異與獅子草迥殊並存以俟考

石打穿

鐵筭篇

葛祖方一名龍芽草石見穿地胡蜂地蜈蚣。百草鏡地蜈蚣與神仙對坐相似惟葉上有紫斑爲別且神仙對坐草之花每節兩朶此則攢聚莖端或三四或五六相聚爲別疑卽石見穿。龍芽草生山土立夏時發苗布地葉有微毛起莖高一二尺寒露時開花成穗色黃而細小根有白芽尖圓似龍芽頂開黃花故名金頂龍芽一名鐵胡蜂以其老根黑色形似之又一種紫頂龍芽莖有白毛

葉有微毛寒露時抽莖開紫花成穗俱二月發苗  
葉對生貼地九月枯七月採。按石打穿綱目於  
有名未用下列之只言止骨痛大風癰腫不言他  
用而葛祖遺方載其功用甚廣並有諸名考之百  
草鏡龍芽二種與地蜈蚣俱非一物論其功用石  
打穿治黃疸地蜈蚣治跌撲黃疸故百草鏡因其  
用相同於地蜈蚣下註疑卽石打穿於龍芽草下  
註亦名石見穿治下氣活血理百病散痞滿跌撲  
吐血崩痢腸風下血明明二種功用各異不知葛  
祖方何以混爲一此書傳自明末或有外訛或有

的識未敢妄議附識於此以俟再考。敏按蔣儀  
藥鏡拾遺賦云滾咽膈之痰平翻噦之胃石打穿  
識得者誰註噎膈翻胃從來醫者病者羣相畏懼  
以爲不治之症余得此劑十投九效不啻如饑荒  
之粟隆冬之裘也乃作歌以誌之歌曰誰人識得  
石打穿綠葉深紋鋸齒邊濶不盈寸長更倍圓莖  
枝抱起相連秋發黃花細瓣五結實匾小針刺攢  
宿根生本三尺許子發春苗隨弟肩大葉中間夾  
小葉層層對比相新鮮味苦辛平入肺臟穿腸穿  
胃能攻堅採掇莖葉擣汁用蔗漿白酒佐使全噎



扁飲之痰立化津嚥平復功最先世眼愚蒙知者  
少歧黃不識名浪傳丹砂句漏葛仙事余愛養生  
著數言據歌中所言形狀則又似鐵筯箒故並存  
其說而附錄之。癸丑余親植此草於家園見其  
小暑後抽臺屈大暑卽著花吐蕊抽條成穗儼如  
馬鞭草之穗其花黃而小攢簇條上始悟馬鞭草  
花紫故有紫頂龍芽之名此則花黃名金頂龍芽  
與地蜈蚣絕不相類因此草亦有地蜈蚣之名故  
百草鏡疑爲石見穿也。李氏草秘石見穿生竹  
林等處葉少如艾而花高尺許治打傷撲損膈氣

則石見穿之葉如艾又與石打穿之葉深紋鋸齒  
不侔矣

葛祖方消宿食散中滿下氣療吐血各病翻胃噎  
膈瘧疾喉痺閃挫腸風下血崩痢食積黃白疔  
腫癰疽肺癰乳癰痔腫

乳癰初起 百草鏡龍芽草一兩白酒半壺煎至  
半碗飽後服初起者消成膿者潰且能令膿出不  
多

鐵笊箒

山間多有之綠莖而方上有紫線紋葉似紫頂龍

芽微有白毛七月開小黃花結實似筴帚形能刺  
人手故又名千條針。百草鏡芒種時開花成簇  
○種福堂方鐵筴帚卽石見穿綱目馬蘭子亦名  
鐵筴帚其葉似薤根如刷帚與此全別草寶云鐵  
筴帚葉似紫頂龍牙而無毛爲別七月開小黃花  
結實類筴帚能刺人手故名黃疸用此草乾者一  
兩白酒煎服四五劑卽愈

治風痺血崩黃疸吐血跌撲鬼箭風如神搗敷肩  
癰鶴膝風鮮者連根葉如秋冬根老取葉汁加飛  
麩調勻包紫煎湯浴瘡疥立愈

治風痺鶴膝等風。○茅崑來效方鐵筦箒三兩龍  
眼肉半觔酒煮飲。○又方鐵筦箒白毛藤地蘇木  
龍芽草蒼耳草各一兩酒煎服五劑

風痺藥酒。○救生苦海云并治跌打瘋腫鐵筦箒  
八角金盤根白毛藤蘇木絡石藤各一兩酒浸十  
日用

跌打傷 金居士選要方用鐵筦箒三兩酒煎服  
鬲症 蔣雲山傳方石打穿草按月取草頭一個  
如三月三個四月四個以月分爲多寡之數搗汁  
同人乳羊乳汁攪勻服立效

面上斑駁 朱子和方取鐵筯箒地上自落下葉  
并子煎湯澄清洗面三四次其斑自消

鶴膝風 種福堂方石見穿草用根梗俱紅色者  
佳連枝俱用如秋冬根梗俱老止用葉半分俱要  
當日取新鮮者隔宿勿用同鐵筯箒草一分加飛  
麩少許同打紫藤眼內

### 狗卵草

一名雙珠草生人家頽垣古砌間葉類小將軍草  
而小穀雨後開細碎花極間結細子似腎又類椒  
形青色微毛立夏時採○百草鏡云蔓延而生喜

生土牆頭上三四月採五月無二月發苗乃小草也三四月間節極中結子形如外腎內有兩細核性溫治疝氣行下部發大汗爲妙治腰痛

疝氣澹寮方 用狗卵子草鮮者二兩搗取汁白酒和服饑時服藥盡醉蒙被暖睡待發大汗自愈此草性溫能達下部如無鮮者須三四月預採曬乾存貯倘用乾者止宜一兩煎白酒加紫背天葵五錢同煎更妙。庚戌予館臨安暑後荒圃多生此草驚蟄後發苗似小將軍而葉較小色亦淡綠春分後卽開花細碎藕合色節極輒有花結子如

狗卵頗壯滿可觀其草蔓地千百穗併一根立夏後多槁予同舍許氏子髫年患疝發輒作厥以此草煎酒服後永不再發

一粒金丹

一名洞裏神仙又名野延胡江南人呼飛來牡丹處處有之葉似牡丹而小根長二三寸春開小紫花成穗似柳穿魚結子在枝節間生青老黃落地復生小枝子如豆大其根下有結粒年深者大如指小者如豆一種黃花者乃蒿屬根上亦無子採取不可悞用

治跌打損傷風氣消癰腫便毒瘰癧天蛇毒鴉翅  
毒搗敷火丹痔腫風痺閃肭腰痛

腫毒初起 百草鏡取一粒金丹根上子一兩搗  
汁陳酒和服并治療癧初起

兔耳一枝箭

獨葉一枝鏡

金

兒酸

生陰山脚下立夏時發苗葉布地生類兔耳形葉  
厚邊有黃毛軟刺莖背俱有黃毛寒露時抽心高  
五寸許上有倒刺而軟卽花也每枝只一花故名  
一枝箭入藥用綿裹煎恐有毛戟射肺令人咳○  
百草鏡兔耳一枝箭葉如橄欖形邊有針刺只七



八葉貼地生八月抽莖高近尺許花如柏穗而有  
萌刺莖葉有毛七月採有小鹿脚銀茶匙忍冬草  
月下紅等名○汪連仕云兔耳箭初生苗名金茶  
匙入血分止吐血治肺癰王安采藥方葉底紅者  
名金茶匙

性寒味苦行血涼血入肺經清肺火治吐血勞傷  
調血最效爲怯弱要藥肺癰肺痿黃疸心疼跌打  
風氣傷力咳嗽咯血腫毒

腸癰肺癰縮脚癰 慈航活人書用白石楠葉嫩  
腦十二箇兔耳草二兩好酒煎服肺癰二服腸癰

縮脚癰一服卽愈

骨蒸勞怯 吳普仁方用兔耳一枝箭蒸鷄服

獨葉一枝鎗

生深山四五月間土人採得入市貨之長二三寸一莖二梗一梗有葉葉如兔耳又似箭頭一梗細尖如新抽竹萌故名○百草鏡獨葉一枝鎗生山原清明時發苗穀雨後死長二三寸一葉一花葉如檄欖花似錐鑽

味甘淡功用與一枝箭同○朱垺齋任城日記諸毒蟲咬以獨葉一枝鎗草生擦之卽愈

金邊兔耳

形如兔耳草貼地生葉上面淡綠下面微白有筋  
脈緣邊黃毛茸茸作金色初生時葉稍捲如兔耳  
形沙土山上最多

味甘淡治虛勞吐血

兔耳酸

注連仕草藥方即穿地鈴治跌打損傷

金線釣蝦蟆

蔓生田野山石間葉似三角風光潤帶青黃色根  
名金線釣蝦蟆又名獨脚蟾蜍亦名金線重樓準

繩痘毒方中用之非綱目草河車及蚤休也。丹房本草金鈴草一名挂金藤亦曰金線釣蝦蟆其子狀如鈴折斷莖液如乳汁取自然汁伏雄制硫其霜可煉雌煮汞。百草鏡金線釣蛤蟆生山土莖蔓紅細根大葉類金鎖匙芒種時開花如穀精花採根入藥按防已亦與此相似但根形不似蛤蟆莖不甚紫葉不甚圓有尖岐葉中蛛蝟紋不明不多爲別。草寶云金線重樓生陰山脚下根有疙瘩形類蟾蜍入土不深削土易取其性涼乃吐藥也小滿時發苗莖延紫色葉不相對類黃龍藤

而柔軟葉上有蛛網紋甚明若葉不圓而微尖紋不明莖不甚紫形不類蟾蜍者乃防已非重樓也  
○汪連仕草藥方紅線者是金線吊蝦蟆青莖者乃漢防已○王聖俞云重樓根儼如三足蟾其根旁又生根結蟾蜍年久者掘得一本之下根有數十蟾蜍纍纍橫掛其力最大○趙貢栽云金線釣蛤蟆生者力大乾者稍次凡大毒服之必吐人多懼畏勿用然吐後其病如失毒卽內消凡發背毒氣攻心非此不治若小毒斷不可用因藥力性大病不能相當也不能相當則有偏勝之害

性平味苦消癰去風散毒 百草鏡根性涼托蠶  
疽追散腫毒治癰癤爲外科聖藥○採藥志治腸  
癰追風敗毒○葛祖方吐痰涎可代瓜蒂○扁鵲  
心書金線重樓俗名金線釣蝦蟆采得去外黑皮  
用石槌打碎勿犯鐵器曬乾爲末小磁瓶收貯凡  
遇一切要吐痰涎之症用代瓜蒂最妙風痰結胸  
用一錢陰陽水和服傷寒成瘡用一錢臨發空心  
水和服禁口痢用一錢涼水服忌鐵器

跌撲傷 張氏傳方取根搗汁酒和服渣敷

葉名天膏藥 貼腫毒破爛能拔毒收口拍熟吐

毒能拔毒水外出酒煎服治心疼磨水搽痔煎膏  
貼百病○汪連仕草藥方天膏藥治疔瘡惡毒流  
注痺毒鼠癩合生酒搗服敗毒功多食之令人吐  
瀉

雞蝨草

此草深秋有開紫花子如椒核處處原隰皆有葉  
如苧麻葉而氣臭故名雞蝨必效方云海甯沈清  
芝患風毒穿流五六處疼痛異常覓此草服之一  
劑卽愈

治風毒流火取一握煎酒吃或入酒煮一炷香去

渣服俱效

老君鬚

百草鏡云此草立夏後發苗葉似何首烏微狹對生莖與葉俱微有白毛不似首烏莖葉之光澤根類白微白色極多故名入藥用根○王安採藥錄老君鬚生溪澗邊起藤二三尺梗青根鬚白黃色有數十條能消痞○按王三才醫便云老軍需春夏秋冬常有青出衆草爲尊莖藤青葉似檳葉而尖小根如鬚白似芋頭根牽藤而去俗名社公口鬚亦治腫毒採根搗生酒服渣敷患處



味辛性熱破瘀毛氏癰痺方用之治瘰癧

治痞結一醫便痞結年久成龜鼈者累用極效用  
老軍需一味春夏用莖葉秋冬用根不拘多少用  
好生酒一罐外用鯽魚一雙和藥同入罐內日落  
時煮以魚熟爲度令患人先食魚次飲酒再以藥  
渣撲痞結所至次早去之大小便見物下卽效如  
不應連服三五次追其物無跡而神效難言

余曉園云治風痺消血瘦面黃痞塊

汪連仕云老君鬚根細如白微理氣消腫通利關  
格敗毒消癰俱以酒煎服

王安采藥方金釵草根名老君鬚合龍虎丹用治  
三十六種風症癱瘓鶴膝等風

### 葛公草

傳信方云葉似蛇卵草又似吉慶子面青有蒙背  
白色三葉分枝梗似薔薇有刺四月間結子取根  
用子亦可入藥

治血症傳信方云將葛公根一兩忌鐵器用木擊  
碎以水二大碗煎作一碗加好酒一碗再煎至茶  
杯八分臥時服服後蓋暖周身以手磨胸膈臍腹  
數遍明晚如前再服一兩後日亦如前服一兩連

本草綱目卷之五  
服三日愈

葛祖方葛公草一名家母藤治脚氣腫疼沙木腿  
搗汁熬成膏鵝翎掃患處乾卽潤之

### 芸香草

職方考出雲南府能治毒瘡入夷方者携以自隨  
如嚼此草無味卽知中蠱急服其汁吐之可解○  
按雲南志出昆明有二種五葉者名五葉芸香非  
葉者名非葉芸香治瘴瘧

藥性考云生成五葉產昆明治瘡毒等疾專能解  
蠱擣汁服之非柔芸香能截瘴瘧夷人多邪蠱携

此草嚼之無味卽知中毒

雲南志解蠱治毒瘡一切瘡毒瘰癧並搗汁服  
藥性考味辛治症同

鏡面草

滇南志出滇中能通血脉○按此草今處處有之  
多生階砌石畔葉如指面大而圓其邊微作碎齒  
葉面光如鏡深綠色土人呼爲蟾兒草又名地連  
錢不見開花止見葉而已亦呼鏡面草不知滇中  
所產卽此類否

性涼治肺火結成膿血癰疽

採藥志

月閉和敵蓑

煎酒服 滇南志

石將軍

一名紫羅毬秋時開花有紫色圓暈生高山石上  
立夏後生苗葉類龍芽草畧小對節高不過尺根  
本勁細似六月雪○謝雲溪云西湖鳳凰山有之  
生石岸旁者入藥地上生者太肥治症不能卽  
驗葉如椴木對生方梗紫色高尺餘開細紫花成  
毬能活血疎風消瘀散腫

味淡性平治一切跌打損傷血瘀不散搗汁服之  
或以水酒同煎如風寒閉塞或癰疽初起服之俱

效

五葉草

此卽燒人場上草也程雲來卽得方名五葉草亦  
不載形狀

能移痘後眼翳用此草搗如豆大一小餅如左眼  
有翳貼右眼角肉上其翳卽移至右眼再用此餅  
貼左眼角肉上其翳移至鼻梁內卽去此餅翳膜  
便除

蛇草

諸羅志形似波稜開小白花 按綱目有蛇眼草

生古井及年深陰溼地形如淡竹葉葉背有紅圈  
如蛇眼狀搗敷治蛇傷未知卽一物否附以俟考  
治蛇傷連根搗罨傷口仍煎泡酒服立愈

汪連仕采藥書蛇眼草產鄉間蘆叢水澤旁甚多  
治一切蛇傷疔痔俗呼蛇口半枝蓮又名落得咬  
千年健

朱排山柑園小識千年健出交趾近產於廣西諸  
上郡形如藤長數尺氣極香烈可入藥酒風氣痛  
老人最宜食此藥忌菜菔

壯筋骨

浸酒同鑽地風虎骨牛膝甘  
枸杞二盤沙草藥作理風用

止胃痛酒磨

服

蜈蚣萍

生溪澗田港止水中若流水則不生形如蕨其中一莖兩旁細葉攢對似蜈蚣狀故名葉頗糙澁不似浮萍之光澤網目水藻集解下有馬藻葉亦對生形亦微似而實非一物蓋藻可食此則不可食故主治亦別也俗呼邊箕萍○羣芳譜麻藻萍之異種長可指許葉相對聯綴不似萍之點點清輕也按麻藻卽今蜈蚣萍

治蝨 同壽錄蜈蚣萍曬乾燒烟熏之則一切跳



蚤壁蟲皆除

老鶴草

龍柏藥性考補遺出山東

味苦微辛去風疎經活血健筋骨通絡脈損傷痺症麻木皮風浸酒常飲大有效或加桂枝當歸紅花芍藥等味又藥用莖嘴

鬼香油

汪連仕草藥方鬼香油細葉者名天香油連根葉搗汁其味如香油故名○李氏草祕鬼香油苗葉如香薷

一人大腿腫痛二三月有膿內潰不得出垂危

上卽破膿出數服而愈以此草汁調敷藥尤妙

治諸癰腫毒冬瓜癰附骨疽

李氏草秘

冬瓜癰附

骨疽用此草加甘草一錢入醬板鹽花搗罨有效  
潤肌膚滋顏色敗瘡毒土人止蛇咬蜂螫莖毛傷  
取葉擦之

汪連仕草藥方

### 肥兒草

龍柏藥性考補遺產廣西平樂縣

治小兒一切疾及痧脹需爲要藥

### 玉叉草

李氏草秘此草對葉圓梗生近田水溝中

治打傷跌腫損折搗汁服之罨諸腫毒

汪連仕采藥書草裡金釵開黃花細莖獨苗直上  
如醒頭草治金瘡活血白濁遺精開白花者草裡  
銀釵白玉釵草治婦女白帶白淫合生白酒煎服

石蛤蚧

百草鏡生山土根皮色紅入藥用根○周維新云  
石蛤蚧乃映山紅之根○花鏡云山躑躅俗名映  
山紅類杜鵑花而稍大單瓣色淡若生滿山頭其  
年必豐稔有紅紫二色紅者取汁可染物○李氏

草秘石蛤蚧苗長二三尺莖方葉似竹葉根形如  
蛤蚧堅如石○敏按汪連仕方映山紅根名翻山  
虎土人呼搜山虎治癰痺能拔根醫風合巴山虎  
蒸酒服名二虎丹核其功用雖不甚懸殊而究其  
形狀的非一種當以李氏草秘所載爲是

煎洗梅瘡能消風塊

風氣痛 祝穆效方地蜈蚣草石蛤蚧草各等分  
紹酒煎服

腸癰 景岳新方腸癰生於小肚角微腫而小腹  
隱痛不止者是若毒氣不散漸大內攻而潰則成

大患急宜以此藥治之先用紅藤一兩許以好酒  
二碗午前一服醉臥之午後服紫花地丁一兩許  
亦如前煎服服後痛必漸止爲效然後再服末藥  
除根○末藥方用當歸五錢蟬退殭蠶各二錢天  
龍大黃各一錢石蛤蚧五錢老蜘蛛二個新瓦上  
以酒杯蓋住外用火煨乾存性同諸藥爲末空心  
用酒調服一錢許日逐漸服自消

經驗廣集石  
蛤蚧用藥

禿瘡 不藥良方云卽肥瘡日久延蔓成片髮焦  
脫落又名癩頭瘡先以艾葉鴿糞煎湯洗淨瘡痂  
再用豬肉湯洗之隨用躑躅油以躑躅花根四兩

搗爛用菜油一碗煎枯去渣加黃蠟少許布濾候冷以青布蘸搽日三次氈帽戴之勿令見風散毒能令癢止髮生久搽自效

疔腫諸毒○李氏草秘石蛤蚧用酒磨服少得入口垂死可生有此則不愁疔瘡之患諸腫毒醋磨敷之

### 香蕉

皇華紀聞粵地濕熱人多染麻瘋所居室人不敢處必種香蕉木本結實者於院中一二年後其毒盡入樹中乃敢居 兩廣雜志蕉種甚多子皆甘

美以香牙蕉爲第一名龍奶奶者乳也言若龍之乳不可多得然食之寒氣沁心頗有邪甜之目其葉有硃砂斑點植必以木夾之否則結實時風必吹折故又名折腰娘凡蕉葉必三三開則三落落不至地但懸挂莖間乾之可以作書花出於心每一心輒抽一莖作花聞雷而坼坼者如倒垂菡萏層層作卷瓣瓣中無蕊悉是瓣漸大則花出瓣中每一花開必三四月乃闔一花闔成十餘子十花闔成百餘子小大各爲房隨花而長長至五六寸許先後相次兩兩相抱其子不俱生花不俱落終

年花實相代謝雖歷歲寒不凋子經三四月始熟  
粵人嬰兒乳少輒熟蕉子飼之又以浸酒味甚美  
其蕉心嫩白可爲焗綱目芭蕉條下所載各類於  
香蕉獨未明晰今依粵志補之

收麻瘋毒

五雜俎鳳尾蕉其本麓巨葉長四五尺密比如魚  
刺然高者亦丈餘又有番蕉似鳳尾而小相傳從  
流求來者云種之能辟火患是水精也枯時以鐵  
屑糞之或以鐵釘釘其根上則復活蓋金能生水  
也植盆中不甚長一年纔落下一葉計長不能以



寸亦不甚作花予種之三十年僅見兩度花其花亦似芭蕉而色黃不實

鐵樹葉

出東洋舶上帶來葉如篋箕生兩旁作細尖瓣嗅之有清氣似梅花香○按羣芳譜鐵樹出海南閩廣多有之其花狀如鐵絲燈籠廣張千瓣瓣各一花程扶搖花鏡鐵樹葉類石楠質理細厚幹葉皆紫黑色花紫白如瑞香四瓣較少團一開累月不凋嗅之乃有草氣海南人言此樹黎州極多有一二尺長者葉密而花紅樹儼類鐵其枝極穿結甚

有畫意入盆玩最佳但人罕見故稱奇耳橫州馴象衛殷指揮貫家有鐵樹每遇丁卯年開花而出五臺山者定以六月十九日開花楊萬里詩注鐵樹葉似蕩而紫幹如密節菖蒲似此諸說同一鐵樹而開花與枝葉又不同如此今洋中帶來及世俗所用入藥之鐵樹葉形如篔簹據云其樹須壅以鐵屑乃盛則番蕉葉也以其食鐵故亦名鐵樹其性亦平肝取其相制爲用亦頗驗謝肇浙五雜俎番蕉能辟火患將枯時以鐵屑糞之或以鐵釘釘其根則復活蓋金能生水也種盆中不甚長一

年纔落下一葉計長不能以寸亦不甚作花三十年僅見兩度花耳花亦似芭蕉而色黃不實羣芳譜鳳尾蕉一名番蕉產於鐵山如少菱以鐵燒紅穿之卽活平常以鐵屑和泥壅之則茂而生子分種易活江西塗州有之花鏡鳳尾蕉一名番蕉產於鐵山江西福建皆有葉長二三尺每葉出細尖瓣如鳳尾之狀色深青冬亦不凋如少菱黃以鐵燒紅釘其本上則依然生活平常不澆壅以生鐵屑和泥壅之自茂且能生子分種易活極能辟火患人多盆種庭中以爲奇玩友人唐振聲在東甌

見鳳尾蕉土人皆呼爲鐵樹則知今人所用及洋  
舶帶來之葉皆番蕉葉而非真正鐵樹葉也瀕湖  
於隰草部祇列甘蕉蕞荷而於虎頭鳳尾等蕉概  
不及焉或當時未有知其性者今錄之以補其缺  
平肝統治一切肝氣痛

難產 鐵樹葉三片煎水一碗服之卽下 指南

### 鐵樹

家寶真傳云亦名鐵連草生於鐵山銅壁之上又  
鐵石之上亦生並非草本形如屏風狀如孔雀尾  
分張黑色細枝刀砍不斷斧之乃折

治一切心胃及氣痛煎湯服立愈

藥性考鐵樹黑色葉類石楠逢丁卯年開花四瓣  
紫白色形如瑞香圓小不穉樹高數尺止血下痰  
其花人採以治痰火

留青日扎鐵樹花海南出樹高一二尺葉密而紅  
枝皆鐵色生於海底諺云鐵樹開花喻難得也

### 虎頭蕉

出福建臺灣五虎山者佳一莖獨上葉抱莖生不  
相對形類蕉而小苗高五六寸秋時起莖開花似  
蘭色紅結實有刺類蓖麻子外面苞狀若高三四

尺者名美人蕉係一類二種也

今閩沙縣亦出草寶虎頭

蕉性溫力猛有毒能治風痺凡服者不得過二錢服後須避風倘不謹慎必發風疹

治風痺性熱去風

治血淋白帶一切吐血 舟車經驗方用芭蕉一大片入鍋內炒乾存性爲末黃酒調服立效此方亦治一切吐血若用美人蕉更妙

藝草

宦遊筆記南人呼爲藝麻北人呼爲蝎子草黔境遍地有之葉類麻多毛刺觸之螫人腫痛不可忍

此毒甚於蜂蠆蝎蝮墨莊漫錄川陝間有一種惡草羅生於野其枝葉拂入肌肉卽成瘡疱浸淫潰爛久不能愈卽蕤麻也白香山詩颶風千里黑蕤草四時青此草有花無實雪下猶青故也人海記塞山有毒草中人肌膚毒甚蜂蠆自唐山營踰汗鐵木嶺外遍地有之俗名蝎子草蘆高四五尺葉如麻嫩時可供馬秣經霜則辛螫不可觸綱目葶麻條止載其塗蛇毒點風癩他皆未及悉補之

浴瘋

采取煮汁洗

亦可肥豕

解暈草

卽廣東萬年青

今人呼爲廣東萬年青葉如建蘭而深厚入冬不凋初茁芽背作紫色長則色青夏開紫花成穗亦如麥冬狀其根有子分苗種極易繁茂以其出自粵中故名綱目有名未用吉祥草下瀨湖所引吉祥草卽此也亦呼吉祥草時俗婦臨蓐以此草連盆移至產室云能解產厄及血暈此草色澤翠潤葉葉勁直如箭入產室則葉皆軟垂色亦槁瘁必經數月乃復鮮艷亦一奇也其根下子入藥用海甯

周世任云此草根下子大冷子宮凡婦欲斷產取子百粒搗汁服永不再孕矣

性涼味甘理血清肺解火毒爲咽喉七十二症要



藥

治急驚 活人書用洋吉祥草根搗汁加冰片少許茶匙灌下三匙立甦

萬年青

一名千年蓋潤葉叢生每枝獨瓣無歧梗葉頗青厚夏則生葢如玉黍狀開小花叢綴葢上入冬則結子紅色性善山土人家多植之浙婚禮多用之伴禮函取其四季常青有長春之義○百草鏡四月八日浴佛日杭俗人家植萬年青者多剪其葉棄擲街衢云令人踏之則易長且發新葉茂密入

藥采葉陰乾煎洗坐板痔瘡極效勝於他日采者  
土宿本草雁來紅萬年青皆可制汞

甘苦寒治咽喉急閉搗汁入米醋少許灌之吐痰

而愈

藥鏡云其根多作草  
熏氣入腹令人嘔吐

子可催生

從新乳香湯  
吞一粒男左

女右手  
中帶出

藥性考云味苦微甘解毒清胃降火能止

吐血同紅棗七枚劈開煎飲用嫩葉陰乾根療喉

痺以養心葉短尾圓者真

白火丹 祝氏效方萬年青搗汁服

痔漏○家寶方萬年青葉取汁如無汁如無根水

少許同搗取汁搽

老幼脫肛 慈航活人書萬年青連根煎湯洗川  
五倍子末敷上立效

一切跌打損傷 活人書山芝麻橡栗樹花萬年  
青花鐵腳葳靈仙汁爲丸黃豆大每服一九陳酒  
下

頭風 嵩崖雜記霹靂丹治頭風如神用萬年青  
根削尖蘸硃砂塞鼻孔內左塞右右塞左兩邊痛  
者齊塞神效取清水鼻涕下須一週時妙

蛇毒 德勝堂傳方用萬年青磨塗渣罨皆妙  
陰囊大 用萬年青根搗汁熱沖陳酒服三次卽

愈

痔瘡腫痛難行 活人書猪腿骨去兩頭同萬年

青入砂鍋內水煮一炷香乘熱薰溫洗日三次數  
日愈永不發

纏喉風 經驗單方用萬年青根頭切碎打爛絞  
汁灌下吐出痰涎卽好倘口閉用牙刷挖開灌下  
不吐再用髮梢進喉間探之

汪連仕云萬年青俗呼冬不凋草治瘡毒收濕熱  
洗腳氣湯泡火傷天泡瘡白蛇纏搗汁搽

王安采藥方治中滿蠱脹黃疸心疼哮喘咳嗽跌

打傷

李氏草秘萬年青今酒肆多種之能解眼蠱治白  
火丹爲末酒服一二錢卽愈又治噎膈

仙半夏

各種麴附

近日諸醫皆用之藥肆亦多製備相傳製法係仙  
人所傳故名仙半夏能化痰如神若不信將半夏  
七八粒研入痰碗內卽化爲清水其法用大半夏  
一觔石灰一觔滾水七八碗入盆內攪涼澄清去  
渣將半夏入盆內手攪之日曬夜露七日足撈出  
控乾用井花水洗淨三四次泡三日每日換水三

次撈起控乾用白礬八兩皮硝一觔滾水七八碗  
將礬硝共入盆內攪涼溫將半夏入內浸七日日  
曬夜露足取出清水洗三四次泡三日每日換水  
三次取出控乾入後藥甘草南薄荷各四兩丁香  
五錢白荳蔻三錢沉香一錢枳實木香川芎肉桂  
各三錢陳皮枳殼五味子青皮砂仁各五錢右共  
十四味切片滾水十五碗晾溫將半夏同藥入盆  
內泡二七日足日曬夜露攪之將藥取出與半夏  
同白布包住放在熱坑用器皿扣住三炷香時藥  
與半夏分胎半夏乾收用有痰火者服之一日大

便出似魚膠一宿盡除痰根永不生也綱目半夏  
條附方載法製半夏其製法與此不同今藥肆所  
售仙半夏惟將半夏浸泡盡去其汁味然後以甘  
草浸曬入口淡而微甘全失本姓名曰仙半夏並  
非照方製法醫家亦視虛人有痰者用之以爲性  
平和而不傷於燥烈是無異食半夏渣滓何益之  
有

清痰開鬱行氣理痺痰疾中風不語研心八粒同  
井花水送下以手摩運腹上一炷香時卽醒能語  
敏按龔雲林云仙方製半夏化痰成水皆治壯人

痰火有餘之症服之有效虛人痰火忌服

各種半夏麴 綱目半夏修治條引韓飛霞醫通造半夏麴云能專治各病又不載其製法特爲補之

生薑麴 薑汁浸造治淺近諸痰

礬麴 礬水煮透兼薑和造最能卻水治清水痰也

皂角麴 煮皂角汁煉膏和半夏末爲麴或加南星稍加麝香治風痰開經絡

竹瀝麴 用白芥子等分或三分之一竹瀝和成



略加麩和治皮裡膜外結核隱顯之瘰

麻油麩 麻油浸半夏浸五日炒乾為末麩和造

成油以潤燥治虛欬內熱之瘰

牛膽麩 臘月黃牛膽汁畧加熟蜜和造治癩癧

風瘰

開鬱麩 香附蒼朮撫芎等分熬膏和半夏末造

成治鬱瘰

硝黃麩 用芒硝十分之三同麩煮透為末煎大

黃膏和成治中風卒厥傷寒宜下由於瘰者

海粉麩 海粉雄黃居半夏之半煉蜜和造治積

痰沉痼

霞天麩 用黃牛肉煎汁煉膏名霞天膏將膏和半夏末爲麩治沉疴痼痰以上諸麩並照造麩法草廩七日待生黃衣懸掛風處愈久愈佳

建神麩

范志麩 白酒藥麩附

出福建泉州府開元寺造者佳此麩採百草罨成故又名百草麩以黑青色煎之成塊不散作清香氣者眞色帶黃淡者曰貢麩力和平不及青黑者力大此麩愈陳愈妙 藥性考泉州神麩微苦香甘搜風解表調胃行痰止嗽瘡痢吐瀉能安溫疫

嵐瘴散疹消斑感冒頭痛食滯心煩薑煎溫服或  
二三錢造云百草法秘不傳得名范志塊造方端  
用之應效饋遠人歡○蔡氏藥帖云治風寒暑濕  
頭眩發熱表汗立愈能消積開胸理膈調胃健脾  
及四時未定之氣兼能止瀉消腫及飲食不進等  
症又能止霍亂吐瀉咳嗽赤白痢疾小兒傷饑失  
飽一切症倘外出四方不服水土瘴氣肚痛皆取  
效如神○范志齋祭協德住泉州府城西街東塔  
前向造百草神麩卽今建麩每個重半筋或四兩  
乾隆辛卯五月蔡氏正造麩忽有一客至視百草

而嘆曰當今男婦老幼秉氣衰薄百草恐傷元氣  
子有奇方共藥九十六味配合君臣佐使另加十  
二味青草紫蘇薄荷等物搗爛煎湯合共一百零  
八味製爲小方塊每塊一兩按端午及六月六日  
諸神會聚皆可依法製造藥性平和氣味甘香遠  
行者宜備可以代茶常服大人每服三錢水一碗  
煎七分小兒每服一錢五分水一茶鍾煎六分半  
饑飽時服忌生菜惟孕婦不可服此藥切片煎湯  
藥渣不散須認形色淡黃者爲眞○福建泉州府  
城內范志吳亦飛馳名萬應神麩氣味中和清香

甘淡能搜風解表開胸快膈調胃健脾消積進食  
和中解酒止瀉利水治四時不正之氣感冒發熱  
頭眩咳嗽及傷食腹痛痞滿氣痛嘔吐泄瀉痢疾  
飲食不進等症痘疹初發用托邪毒又治不服水  
土瘴氣瘧痢外出遠行尤宜常服大人每服三錢  
水一湯碗煎七分小兒每服一錢半或一錢水一  
大茶鍾煎七分每錢破作五六塊外感發熱頭眩  
咳嗽瘧疾嘔吐俱加生薑同煎泄瀉加烏梅同煎  
惟痢疾一症須加倍用大人每用五錢小兒二三  
錢加好箔茶心同煎每勛價銀一兩六錢若用匣

裝每個五文店住學院考棚邊桂檀巷內觀音亭  
頂南畔第三間范志吳氏牌扁爲記

白酒藥麴 藥性考曰白酒藥麴松江得名良薑  
四兩草烏半觔吳萸白芷黃柏桂心乾薑香附辣  
蓼苦參秦椒九味一兩等分菊花薄荷二兩齊稱  
丁皮益智五錢杏仁共爲細末滑石五觔米粉斗  
八河沙拌勻造丸乾用釀酒芳馨炒焦拌食滯積  
消靈

帕拉聘

七椿園西域聞見錄帕拉聘草根也全似三七但

色藍或黑出溫都斯坦回地人多往采取重價貨於回城云可治疾中土人弗達不敢嘗也

治一切陰冷痼疾服之立除

一枝蒿

紹郡府佐李秉文久客西陲言巴里坤出一種藥名一枝蒿生深山中無枝葉一枝苗土氣味如蒿四月間牧馬卒驅馬入山收草攜歸煎膏以售遠客有販至蘭州貨賣者

活血解毒去一切積滯沉痼陰寒等疾驅風理怯

香草

石振鐸本草補西國產香草山野徧生樹高尺許  
枝幹虬曲經冬不彫花小而色紫白成實時中有  
小黑粒春時插之卽活惡肥而喜潔遇夏卽生小  
蟲因蠅卵所致見小白點與絲網宜去之衣袖觸  
動芬芳襲人可紉以爲佩采其花藏衣箱中能辟  
諸蟲焚其枝葉能辟除瘟疫嵐瘴房屋溽穢氣自  
除

主治解鬱凡心懷憂悶以布包置左脇下之傍能  
令胸膈舒暢○除蚤蝨壁蝨取枝葉暴乾爲粉以  
布包貼肌膚上須多乃效○體受風寒不快以枝



葉煎湯浴之浴後睡片時卽愈○食不知味以葉煎酒空腹飲之同麵食使舌本津津饜飮○面有黑癩取葉或水或酒濃煎每晨塗面能滅癩滋顏○齒痛動搖醋煎葉乘熱擦之漱之○又治胃火盛口臭頭多風痒并髮穢觸人與記舍腦也不堅固取葉煎水服時加醋不特除頭外之病并裨頭之內司蓋人之記舍在腦故也

敏按以上所說皆出泰西石氏本草核其形狀功用則似今人所名奶孩兒草近是但奶孩草正名爛醅草見霜卽萎並非經冬不凋入春子種其宿

根亦不發亦罕有尺許虬曲之枝幹或泰西地暖  
土肥如粵中之茄可以經冬成樹或又別有一種  
木本者姑存其說以俟考

臭草

本草補泰西既產香草復產臭草雖薰不同舊效  
用則一其本高尺餘開小黃花摘花蕊陰乾待用  
與葉同功結子成實裂分四房每房子數粒春秋  
二仲皆可種之春月將枝插之亦活不畏霜雪亦  
不喜肥須澆以清水人以手搗之便臭氣拂拂亦  
非穢污朽腐可比也其功用亦與香草等植樹下

能殺樹上蟲植圃中能辟蛇蝎蜈蚣等諸毒

泄瀉及小便不通取臭草葉或生或煮食之服毒并蛇蝎蜈蚣等毒急取臭草葉生食其毒自解腹內蛔蟲以清油煎臭草葉搗爛敷臍上勝食使君子遠矣鼻血取臭草葉搗爛塞鼻孔卽止危急重病昏暈采葉醋烹搓熟塞鼻卽醒耳痛以臭草葉搗爛取自然汁置石榴皮內煨過滴耳中目痛以葉置清水內露二三夜將葉蘸水點眼目力過勞以臭草葉自然汁加蜂蜜一滴并略加小茴香自然汁調和點眼久則光明楊梅瘡以自然汁略加

好酒并清水粉同煎治之婦人心氣痛病由於子  
宮上沖用臭草葉嗅之以愈爲度大庾曹上士曾  
用此方嘆其靈驗小兒大便腸出以好酒煮臭草  
葉搗爛用布作膏貼之

本草綱目拾遺卷五終

